

洛甯縣志

卷一

序凡圖天地山古里
例考文地理川蹟區

地 150.30
41
部 = 4-8

續修洛甯縣志序

北朝舊縣南國遺區地關巖疆天成要塞扼雍豫之咽喉筦晉秦之門戶左界三箱刀鏃之阻表以金門白馬之山右據二嶠嵯峨之險帶以洛河元漚之川地比函關原名嶠縣時當民國乃曰洛寧自周秦漢魏以來實角逐爭雄之地迄唐宋明清之季亦干戈擾攘之場也幸哉時局底平共和肇造經休養生息之餘民安樂土復鷄犬桑麻之業地化康莊爰爲究地方之原委稽邑乘之廢興自明代以權輿厯清初之考訂浩劫屢經幾成灰燼宏編待續誰爲經營洎康熙卅一載佟襄平甫輯於先越乾隆十二年單高密復修於後補缺拾遺于焉略備開來繼往豈曰無功然而規模粗具紀載猶病其多疏援引失徵棼淆未衷諸一是閱四十年至於乾隆之季有郡守鶴坪張公暨邑侯壽光張令別出心裁重經手訂擅三長

之妙筆廣一邑之新篇劉前守愆惠尤殷張度西編修慨任於時集通儒延碩彥據舊本采羣書廣搜羅深考究補罅漏刪繁蕪統以土地人民政事綱舉而目乃張冠以疆域建設源流條分而縷斯析置郡置州置縣厯代名稱之異既可按籍以求或屬或合或分屢朝遷變之餘無難披圖而見若學校若農田周室之良規可溯曰人情曰風土召公之遺愛猶傳斯固講政治者之準繩亦徵文獻者之淵藪也是故學術事功則薛文靖宋康惠世代濟美焉經文緯武則張建白程大功嗣續皆賢焉蔡子英辭官上疏自足千秋武大烈題壁留詩已垂萬古其他忠潔遺芬循良治績經明行修之士磨筭斷臂之風與夫流寓名賢來游芳躅耆年碩德墨客詞人祀鄉賢崇名宦旌奇節誌遺踪固有指屈不勝而僕更難數者夫豈第天塹雄關矜誇形勝迴谿峻坂保界河山云爾哉無如世易時移山環水

逝回思疇昔轉瞬百年其間厯蹈兵荒迭經匪亂撫斯文者講求弗暇膺斯土者補救未遑豈繼述之無人實國家之多難以是典章散佚掌故淪胥玉碎珠沉竟飄零於風雨篇殘簡斷任淹沒於灰塵嗚呼銅駝荆棘舊籍烟銷金馬荒蕪名流星散其誰復秉春秋之筆而從事記載之書也乎迨民國成立之三年有前知事賈公薦秋本山左之名儒洵洛西之賢宰當轉徙流離之後爲補苴掇拾之謀屢徵舊誌莫睹全書乃訪紳衿乃詢耆舊零統並拾碎錦兼收本以積極之進行暫爲消極之保守抱殘守缺幸集合以成編續舊纂新惜增修之未遞而雲也適逢其會承乏於斯案牘餘閒民刑公暇亟思附驥重邀著史之才切欲續貂賴有捐金之美乃復矢精研進大雅開廣廈就細旃如王習初如張子誠如雷應甫或分其任或協爲理或總厥成采遺聞參新政期審慎務詳明宜創宜因有仍有

補謹按天文之度特詳星野之圖數千年沿革揭表庶幾朗若列眉百廿載見聞類增從此瞭如指掌故原載者則且修飾之潤色之非若新唐之改作而增修者豈謂盡美矣盡善矣有如前漢之續完合羣才以集事閱數月而成編匪惟供博雅之觀匪惟備輜軒之采固將置諸座右奉作指南以示周行以垂殷鑒萬箱渠遺澤孔長宏規誰繼共食園循聲如昨借鏡堪師祇期利世福民建柯無慙於先哲若復著書立說擴充尙望於後賢也是爲序

中華民國六年十月

日

署洛甯縣知事車雲撰

續修洛寧縣志序

紀載之書極博矣至於天下郡縣各存志乘所以紀土地之變遷人民之習尚政治之美惡以開示後人使之資爲考鏡藉以補其偏而救其弊得以轉移民俗挽回世運也所關豈淺鮮哉甲寅夏余承乏斯邑下車卽物色舊志用資瀏覽藉爲治譜乃時經多日卒不可得考詢其故僉云洛甯遠遭髮捻之蹂躪近被盜匪之焚掠舊日邑志多付灰燼卽間有存者亦多殘闕不完未易窺其全豹余聆之不禁爲之唏噓者再然付之闕如此心殊不能釋雖籌款維艱而文獻攸關不得不於萬難籌措之中勉湊百金以作籌備之費爰思集合之法作徵求之舉凡遇碎簡零編均什襲藏之又復於世家耆舊羅致散佚藏本事逾年餘居然湊集完全彙訂成帙付之石印存諸公款局祇爲保存舊志計耳時乙卯冬之某月日也顧斯

志失修已歷多年接踵而增訂之謂非有司者之責與而誰與乃復於丙辰冬邀集邑紳會議續修無如工費浩繁未易籌措僅籌開辦費二百餘金遂於丁巳春聘宜陽王習初先生任總編纂邑紳張君子誠雷君應甫總其成復邀程君恪亭等十五人充當採訪員分里採訪迨志局甫開而新任車公漢傑繼撫斯土慨然擔認後款不數月而歲事改正者十之七八補增者十之三四百餘年未彰之文獻一朝燦然大備俾後之覽斯志者知一邑之土地人民政治皆了然於心補偏救弊有所依據庶乎轉移民俗挽回世運之望斯亦其樞機乎吏治所關固宜亟亟如第謂文人掌故之學抑末也願後之宰斯邑者其亦善體此意賡續而重修之尤余所厚望也已

中華民國六年十月 日

前署洛甯縣知事濟南賈毓鸚撰

續修洛甯縣志序

凡事得其時則可有爲非其時則難致力時固易失而難得者已洛甯舊有縣志前清康熙朝襄平佟公修之乾隆時高密單公修之又踰四十餘年壽光張公重修之蓋所以徵文獻考政治揆民情究物理前人注意於斯備矣至矣迄今百有二十餘年繼起未有纂述舊聞恒多散佚徵疑傳信概付闕如夫豈無人焉思起而續修之惟自嘉道咸同以來災眚洊至兵亂頻仍蹙蹙四方靡有甯歲講吏治者撫字之心方勞執儒業者服古之力亦替補苴張皇奚暇及此蓋當世之非其時也久也民國三年山左賈薦秋先生涖治吾邑政餘之暇訪求縣志而猝不可得蓋佚於寇盜焚掠之餘雖藏書之家鮮有存者繼乃搜殘補闕彙輯成帙因有暫付石印之舉存舊以待續也五年冬值政府有促修縣志之令縣長謀之紳庶

僉謂時哉弗可失乃因以屬之基自揣具乏三長見無一是罔敢率爾操觚而又不敢失此時機貽邑人羞吾友王君習初熟於史氏者也曩歲宜陽縣志固所續訂袁真何如以此推之衆乃歡迎縣長禮延以至俾主筆政基與雷君應甫共勸厥事局方設而豫章車漢傑先生以新令尹至聞斯謀大喜以爲方今世局艱定百端興復在此時也諸君亟爲之於是乎吾邑人士四出採訪窮幽達隱錄前哲之遺稿摩古道之殘碑或詢之野老僮夫或質之文人學子有口述所不能盡者載筆記之有指陳所不能悉者繪圖詳之有似是當否疑信參半者復援引典冊考察輿論折衷而審定之雖不敢遂謂明備而力求明備之苦心則共事諸人所斯須不敢忘者也特是兵燹之餘事實大半無從稽考其中缺歉無敢附會爲之彌補不得不姑從闕文之例是又共事諸人所不能無憾者已是役也非

得賈縣長提倡之功孰與謀始非得車縣長獎勵之力孰與觀成且非得邑人士諸君子之悉心纂述輔翼編輯孰與集思廣益黽勉圖功不數閱月而用藏厥事古語有之雖有智慧不如乘勢雖有鎡基不如待時吾邑斯志固乘勢應時而成者也豈偶然哉豈偶然哉

中華民國六年六月中旬

邑人張守基謹誌

洛甯縣舊志序

永甯 知縣 佟賦偉

郡邑之有志所以紀往而勸來蓋古者方志閭史之遺意也然非略知春秋遷固歐陽述作之大義而考據精密取舍詳慎則往往鄙陋紕謬而不足觀雖記載有大小之異才學有高下之殊至於筆削條例之所在未有惜然無所見而可以率爾操筆者也余自乙丑冬來爲河南永甯令登山臨水想大禹文王召公之遺跡求馮異楊再興徐達之戰地訪張濬薛繼遠流寓之別墅讀蔡子英辭官之書而弔其故里摩挲前令武大烈題壁之詩而哀其忠俯仰千載慨然歎慕退而考其舊志之所書則或載或不載或載而不得其事實及其他之憑臆附會言不文者尤多意欲刪去其牴牾於古者而稍別爲義例本之經史參之聞見以存其本真顧病未能也會大中丞閻公以公孤燮理之才當周畢保釐之任三年有成百廢俱

舉乃蒐羅中原之文獻校正增補作爲通志以示法戒又下令府州縣各志其土地人物上之臺端以備採擇又慮夫作者之不一而無所折衷也復頒之以準格俾有所遵守余於是竊自幸其私願之得遂也乃禮致士之好古知學者與之從事溯沿革別疆界繫星野標山川舉政教之大端錄風俗之遞變列廟祀興作之雜亂存仁賢名跡之凋零述職官而知爲民父母之難詳人物以明行己節義之重條分縷晰體要粗具舊本改易十且四五極知學愧宏博辭非爾雅不足供有識之一笑然其實之經而不敢悖徵之史而不敢誣謹奉大中丞公之準格而不敢踰擬之而言蓋以萬分之一焉文雖不足而質或未遠也惟是反覆職官之舊載自宋元以來且數十百人矣其治行尤異登於簡策者寥寥僅十許人人寥寥僅數語豈皆歲久磨滅不復傳於後世與抑無得而稱故不書其書者不過

頌美之諛辭故泛然加之不情之譽而難以詳悉其陳與余不佞戴星於此六年矣斯民直道來者難誣安知後人之不以無得而稱視余也可不懼哉可不懼哉康熙三十一年

舊志序

永甯 知縣 單履咸

一邑之中必有一邑之政因夫一邑之俗以和乎一邑之民雖不能強而一之然未嘗不可化而齊之也故民俗之升降關乎世運之隆替焉永甯爲中州西鄙介乎萬山之中邑之小焉者也論其地則輿圖中彈丸黑子耳至論其政則政未可以彈丸黑子者而忽之也况乎誌一邑之政必誌一邑之俗誌其俗卽所以誌其民誌其民卽所以誌其時誌其時卽所以誌其世也由邑推郡由郡推省由省以概天下雖方各異政地各殊俗然其升降之大凡則有厯厯不爽者而世運之隆替隨之又惡得以其邑小而遺之也哉予以甲子歲承乏茲土徵求文獻則舊志修於康熙三十一年去今幾六十載夫此五六十年之中雖山川如昨而井里之變遷田疇之墾闢以及物換人移風殊俗革之故無以誌之其將何以傳信來茲也

夫第以風塵鞅掌中良有未遑從事者非泄泄也歲丙寅郡憲古虔曹公修輯郡志檄屬吏各修縣乘以備採擇當此上令下行之會咸雖不敏敢不搜羅往事以補此五十餘年之遺缺者以上報郡憲乎爰是博採舊聞詳加覈實卽舊志之規模而參以所見或合或分有仍有補始於丙寅之夏迄乎丁卯之春凡閱月者八甫得定本先爲鈔錄以上郡憲以彙此五六十年之中舉凡人材之興起風氣之轉移戶口之繁增蕪萊之盡闢與夫利無不興弊無不革者無不兼總而條貫焉庶使後之人覽斯誌也因以推而例之卽其民俗之升降者以稽其世運之隆替焉而想見夫國朝治化之隆百年以來休養生息卽此山陬下邑而亦必吏守其法民安其業如此者藉非聖天子勵精於上賢大吏實心於下又安能喚咻斯民登之於衽席春臺之上以臻此太平全盛也乎則永誌之作正不可因其小

邑之介於萬山者以爲彈丸黑子也而忽之矣然此皆郡憲倡之於上故屬吏得以奉行於下藉以搜羅遺失而誌此一邑之俗以徵此明盛之時也則郡憲之彙輯纂修以成郡誌也其有關於世運者不更什伯於邑誌也歟乾隆十一年歲次丁卯

舊志序

河南府知府

文徽

永甯北魏峭嶺縣地扼秦豫咽喉山谷阻深隄陁春秋以來爲蠻爭螳鬪批
亢擣虛之所我國家仁覆義霽百有餘年曩之廻溪峻嶺咸耕鑿而屋廬
之車牛服賈慶康莊焉余自甲辰由戶部尙書郎奉命出守東都丙午冬
以公事經其地山川澄秀竹木蔚鬱渠泉交織鄉聚駢羅顧而樂之及繙
舊志乾隆十二年重修後歷四十寒暑聖朝令典之昭垂文教之昌蔚民
行之興起土田之開拓河渠之厮隴倍多於昔未加補葺無以爲輜軒采
擇者資而史傳中所謂峭嶺關隘詢之士人幾成樊桐懸圃金門同軌北
陸熊耳長淵所置郡縣黃樞永固立義莎柵劉陽所立防戍及恒農宜陽
熊虢函洛改隸之紛錯茫乎莫攷此又相沿之固陋疎淺不足論矣語邑
之官師網散佚而新之適有濬河役未暇壽光張君至毅然以修纂爲任

集耆紳於庭謀之僉踴躍集事請於余亟爲憇憇而余旋蒙恩擢豫轉運
使吳郡張鶴坪先生來守是邦屹揚風雅出所纂潼川安岳郡邑兩志授
之分土地人民政事三部爲綱以統衆目準繁簡之宜蔚然美善爰倣爲
體例而湘潭張度西先生實任編輯之勞博采羣書取舊志刪其紕纒補
其脫漏飾其汶闡正經界清保甲詳水利辨地形別土宜搜幽遐廣激勸
考古崇今必覈必嚴雖云續舊儼如創始焉稿既成以書寄河北餽次丐
序於余夫志者爲政之書余於登封偃師鞏縣志序中言之詳矣而治巖
邑之法與治原邑不同永甯爲山川恒農塞徼史稱峭嶺地多豪右俗趨勇
不易治自薛文靖以講學化其鄉人材始起沐浴盛代深仁厚澤風氣更
蒸蒸丕變然畛域既遠耳目難周示之易則虞恍我法也操之急則虞震
我師也因其疲則滋之奸也變其新則戩之嚚也疑之深則令格不行也

信之驟則巧以嘗試也聖人以知及仁守莊蒞動之以禮爲治民垂訓奉以治嚴邑尤善張君爲是志舉深崖邃谷古今異宜遠近異尚者釐然燦然於几席之上不出城闔而周知民隱於是乎靜以馭之嚴以臨之廉以率之慈以附之守畫一酌變通勤履勘鋤奸豪禁吏胥察巡緝使吾民優游作息於堯舜之宇而無詰竊僕伎之爲則坐言者信可以起行由嚴邑以給原邑何施而不可余之所望於張君者又豈僅徵文考獻秉經酌史稱紀載之善乎哉張君勉之矣乾隆乙酉嘉平月

舊志序

永寧張楷
知縣

永寧之有志聞自明中葉始久灰兵燹國朝順治年間會重修亦湮沒無存今之志乃乾隆十二年邑令單君履成所修踵康熙三十一年邑令佟君賦偉稿本而約略增之者也微特援引失實例類棼淆紀載疏漏無以上應石渠虎觀之採擇而四十餘年來聖朝政治之隆令甲之盛孝義節烈之彬彬日起倘不爲續輯其何以昭茲來許楷承乏是邑惕然於文獻之將湮也不揣固陋思網羅散佚勒爲一書請諸前郡憲今陞河南糧鹽觀察武岡劉公謀所以勅之邑薦紳士民亦僉謂此志爲不完之本亟宜搜補踴躍襄事顧楷學殖荒落茫然無能爲役忤逢郡憲吳郡鶴坪張公奉命來尹東都下車伊始卽以興禮樂振風雅爲己任詢及志事授楷以潼川府志安岳縣志爲公在蜀中手纂者命遵爲編次楷受而讀之以土

地人民政事三大綱爲提挈本子與氏之言天造地設規模正大義蘊宏深而各自以類相從例不紊亂較對山武功志體更謹嚴有法由是耳目一新得所依据爰發函衍所藏史傳諸書拾殘穿蠹並搜施郡志所攜撫未及者叙沿革之紛紜清山川之脈絡豐古蹟之証據補官師選舉之脫漏詳里保以一政令備溝洫以興水利博采孝義節烈以爲風化陶淬必本諸正史必協諸輿圖間附以辨論不敢爲踳駁而荒辭俚事刪之恒嚴凡四閱月而蕝事較舊志增什之七八焉是役也荷郡憲之訓勉示以率由得免紕繆是郡憲之大有造於嶠山洛水而下邑士民之所朝夕禱祀而求之者矣書曰不由古訓於何其訓又曰非知之艱而行之艱楷膺百里重寄惴惴焉恒懼覆餗今卽以志爲政之考鏡於山川險隘益思所以防禦於前賢治行益思所以則倣於芳行淑德益思所以鼓勵是豈特求

語言文字之雅馴乎哉將自策自奮藉是以報上憲屬望之心并爲後來
官師導夫先路楷之私幸又何如也既呈郡憲鑒定爰書其顛末以授梓
人乾隆五十四年歲次己酉陽月

舊志序

河南府知府張松孫

永甯屬郡之西鄙巖邑也三面皆山巨川橫注龍頭鳳翼有礮石雷駭激矢蚩飛之雄瀉水香泉有翠荇游鱗芳芡蓂荷之產二嶠神奧嶢嶢靈秀鍾毓於斯者不少械樸菁莪金璋圭璧足以彪炳人倫炫耀當世功業則有如宋尙書大本張中丞建白理學則有薛文靖薛直齋父子後先濟美崇祀鄉賢其他懷瑾握瑜經明行修之士則指不勝屈卽閨門之內截髮毀容矢志守節稱巾幗鬚眉者窮簷蔀屋所在皆有苟非蒐羅入志將何以備他日太史輜軒之采彰風化之源烏可以彈丸蕞爾任其湮沒哉己酉之秋予奉天子命尹茲東都永甯張明府以新修志稿來就正展卷披覽雖較舊本已增益美善而於提綱挈領間有未協體裁爰出予昔守梓州時所輯一郡八邑之志付秉筆者倣其體例而改正之復增入大年一

門必如此庶爲善本矣方今聖人在上四海昇平五代同堂八旬有慶壽世自多壽民宜乎嵩山洛水之間耄耋期頤充滿衢巷補諸志乘洵足昭示來茲九老八公又烏庸羨予涖郡半載急於求治每慮汲深綆短惟日孜孜廢者興而墜者舉與僚屬交相勸勉不專以簿書錢穀遂爲盡職修志之舉亦爲政之先務也既付梓張明府來乞弁言時正校士文場爰綴數語應之列諸簡端乾隆五十五年庚戌仲春月

舊志序

邑雷同聲

縣志失修久矣自乾隆己酉縣尹張公集貲重訂而後迄於今百有餘年其間政治之隆替風俗之轉移人材之應運產出不乏可紀倘無人焉輯而續之終恐湮沒弗彰會憶光緒辛丑歲與同學韓子夢筆以二事請於友航郭公曰修鬢宮曰續縣志迨鬢宮既修方擬籌款設局從事輜軒之採而郭公竟以瓜代去會其時雖則有司鐸新蔡之行韓子亦宦遊太原彈指十餘年來桑梓間事茫未過問然對於此心未嘗不惓惓也今承革改之餘地方秩序甫定人民元氣未復驟以是爲請鮮不以不急之務相訾警故閱而未發歲甲寅賈君薦秋以山左名宿捧檄前來積極進行百廢俱舉學校也力求擴充實業也亟謀振興更惕惕乎文獻之將墜而思增修夫邑乘無如款項難籌有願莫償本積極之進行變而爲消極之保

守遂於萬難措手之中勉籌百金搜羅散失舊志集爲全帙先付石印若干部存諸鬢宮雖於近百年來宏文高躅未曾闡發而舊有者庶得保存而無失使人不至歎河源星宿無流可溯此則賈公不得已與未盡之苦衷也尤所望於後之繼起而踵修者

凡例

一舊志不列天文蓋玄遠難知其寓慎重之意顧志猶史也其自歷朝書史以及郡志邑乘往往旁搜遠紹彙編成帙意者志例所存其亦有可以備叙者乎用是據星宿分野之說附以詳異並取西經經緯分度之數悉著之篇以備一格

一舊志於洛寧之爲郡爲縣歷朝之改徙廢置紀述備詳惟沿革之蹟尙費尋繹未盡過目瞭然茲姑列沿革表備考於下作一覽表而並著其疆域形勝以志地理

一舊志以峭山爲羣峯之祖洛水爲衆流所歸周歷四境分列靡遺詳哉其至矣盡矣茲復於某水發源某山某山傍流某水合叙而分注之庶循山導水在指掌間

一舊志於四境之內析保記里統共五十六保後併爲十二里繼又分底張爲兩里共十三里道里之遠近戶口之多寡悉數而備載之庶富何加教養兼施是固主治者所當繫念也今仍之

一舊志於湖峭立縣之始屬之建置立言自古竊以爲是乃國家之建置非郡縣之自爲建置也故以縣列表詳其歷代沿革若夫縣城之大公署之重壇廟寺觀之徧於郊關倉廩津梁之設於城市似無庸各標一門類附以志

一舊志溝洫渠道凡七十二我疆我理南東其畝邑民蒙利多矣迄今陵谷變遷淤塞亦復不少要之故道固可循也倘有講求水利者或因而疏鑿之當工省而效速姑仍舊志之以俟興復

一舊志土產穀蔬花木之屬飛潛動植之類皆人生所常需地利所共